



Fasnacht 2012

Sujet: **Bsuecherrekord am Grümpeli**

In eusem Dorf chasch guet durestarte
Prattele isch e Feschthütte uf dr Schwiizer Charte
X mol im Joor s` isch famos
goht in Prattele d` Party los
ob Fasnacht, Banntag, oder Eierläse
s` Larifari und Blagettevernissage nit vergässe
au uf es Dorf- oder Muusigfescht hämer immer Luscht
genauso wie ufe Wiehnachtsmärt und dr Erscht August.

Doch ei Alass dörf do nit fehle
do müesse mir euch unbedingt belehre
s` isch immer am leschte Summerferie Weekend
solang dass die das vom OK no so wänd
mir meine s` Kicke in Grüppeli
me nennt das im Allgemeine Grümpeli.

Au eusi Clique d`Dorfplatzrueche
si lescht Joor s` Grümpeli go bsueche
si fasziniert gsi vo dere Bombeparty
scho am Igang e mega Stau, naja den wart i
den ändlich de Wäg isch frei, ine ins Zält
lande grad innere andere Wält
ei Gmoscht und Druggede ohni Saich
meinsch sigsch in Basel am Morgestraich
hinter mir e Blondine nit zum Gruuse
drückt a mi Ruge ihre Buse
bi dem vor mir seh i dass er nüm guet stoht
hoppla und scho isch mis Hemli vom Wodka rot
will no uswiche aber scho bini dra
schlo mi Bei amene Bänkli a
de Kellner wo chunnt treit es Chrättli über mir

wenn's dumm lauft nimm i jetzt e Duschi mit Bier
den ändli fertig... i verschnuuf
lieg im Bett und wach uf
zum Glück isch alles nur es Träumli gsi
will die guete Zyte si am Grümpeli scho lang verby.

D'Realität gseht leider anderscht us
mir Rueche chömme do nit drus
s`neue OK mitem Marc Wisskopf a dr Spitze
händ vo luter studiere für Neus afo schwitze
me het s`Grümpeli den um ein Daag verchürzt
mit zwei guete Bands es bitzeli gwürzt
dr Einzig wo zwei Daag Grümpeli tuet störe
so het mes us de Chlemmi chönne ghöre
dört meint dr Stingelin uf dr Pischte:
„Jetzt han i e Früeschoppe weniger uf de Lischte.“

Aber zrugg zum Grümpeli-Fritig
es gäb e tolli Sach läse mir in dr Dorfzitie
oder nei wo hämer das jetzt au wieder entdeckt?
ah jo in dr Grümpeli-Zitie zwüsche de viele Inserat versteckt.

Per Zuefall hämer an dem Fritig Hock
und alli finde: „Jo uf Grümpeli-Party hämer Bock“
also si mir uf d`Häxmatt marschieret
und händ uns vor Einsamkeit fast geniert
denn Lüt hesch im Zält nit viel troffe
oder anderscht gseit es isch nüt gloffe
drby wär d`Muusig jo voll fit
spiele giga mega cooli Hit
numme d`Lutstärki tuet eus störe
chasch de gegeüber nit verstoh und ghöre.

Spöter si mir no d' Bar go bsueche
zum verschiedeneni Drinks versueche
dr Sound tuet durch die leer Bar halle
und dr DJ spielt numme was ihm tuet gfalle
als guete DJ luegsch doch was gfallt de Gäscht
dä nit, drum het er als einzige mit sich selbscht es Fescht.

Als Schachzug am Samstag mir findes en Geniale
wenn selber kickt hesch, muesch numme 6 Stutz Itritt zahle.
Doch dr Adrang lost uf sich warte
es möchte nit viel e Party starte.
Wer wundert dass s' Service Personal nit usglaschtet isch
bi guet geschätzte zwei pro Kellner gfüllti Tisch.

Zum Schluss no es Rätsel zu dere Sach
und hoffe mir bechömmme keins ufs Dach
„Dr Unterschied vom Grümpeli und em Fasnachtzischtig?“ - Nüt...
will es het an beidne Aläss keini Lüt
drum wär's doch sicher nit zum Lache
me würd , Grümpeli am Fasnachtzischtig mache
den hät's OK sicher zum Feschte und Kicke
garantiert scho mol zwanzig verschieden Cliques
drum liebs OK und Komitee tüent das mol versueche
das empfähle Euch die Fasnachts-kickende Dorfplatzrueche.